

般若心經祕鍵

(并序)

遍照金剛撰

文殊利劍絕諸戲

覺母梵文調御師

dhīḥ maṃ 眞言爲種子

含藏諸教陀羅尼

無邊生死何能斷

唯有禪那正思惟

尊者三摩仁不讓

我今讚述垂哀悲

夫佛法非遙，心中卽近；眞如非外，弃身何求？迷悟在我，則發心卽到；明暗非他，則信修忽證。哀哉哀哉長眠子，苦哉痛哉狂醉人。痛狂笑不醉，酷睡嘲覺者。不曾訪醫王之藥，何時見大日之光。

至若翳障輕重，覺悟遲速；機根不同，性欲卽異。遂使二教殊轍，分手金蓮之場；五乘竝轡，踰蹄幻影之埽。隨其解毒，得藥卽別。慈父導子之方，大綱在此乎！

大般若波羅蜜多心經者，卽是**大般若菩薩**大心眞言三摩地法門。文欠一紙，行則十四，可謂簡而要，約而深。五藏般若，嘆一句而不飽；七宗行果，歎一行而不足。

觀在薩埵，則舉諸乘之行人；度苦涅槃，則褰諸教之得樂。五蘊橫指迷境，三佛豎示悟心。言色空，則普賢解頤圓

融之義；談不生，則文殊破顏絕戲之觀。說之識界，簡持拍手；泯之境智，歸一快心。十二因緣，指生滅於麟角；四諦法輪，驚苦空於羊車。況復 *gate* 二字，吞諸藏之行果；*prasa* 兩言，孕顯密之法教。一一聲字，歷劫之談不盡，一名實，塵滴之佛無極。是故誦持講供，則拔苦與樂；修習思惟，則得道起通。甚深之稱，誠宜可然！

余教童之次，聊撮綱要，釋彼五分。釋家雖多，未鈞此幽。翻譯同異，顯密差別，竝如後釋。

或問云：般若第二未了之教，何能吞三顯之經？

如來說法，一字含五乘之義，一念說三藏之法，何況一部一品，何匱何無？龜卦爻著，含萬象而無盡；帝網聲論，吞諸義而不窮。

難者曰：若然，前來法匠，何不吐斯言？

答：聖人投藥，隨機深淺；賢者說默，待時待人。吾未知！蓋可言不言，不言不言，不言言之，失智人斷而已。

佛說摩訶般若波羅蜜多心經者，就此題額有二別，梵漢別故。今謂佛說摩訶般若波羅蜜多心經者，胡漢雜舉。說、心、經三字漢名，餘九字胡號。若具梵名，曰：*buddhā*

bhasa mahā prajñā pāramitā hṛda sūtram。

初二字，圓滿覺者之名。次二字，開悟密藏施甘露之稱。次二字，就大多勝立義。次二字，約定慧樹名。次三，就所作已辦爲號。次二，據處中表義。次二，以貫線攝持等顯字。

若以揔義說，皆具人法喻。斯則大般若波羅蜜多菩薩之名，卽是人。此菩薩具法曼荼羅真言三摩地門，一字卽法。此一一名，皆以世間淺名，表法性深號，卽是喻。

此三摩地門，佛在鷲峯山，爲鶩子等說之。

此經數翻譯。第一、羅什三藏譯，今所說本是。次、唐遍覺三藏翻。題無「佛說摩訶」四字，「五蘊」下加「等」字，「遠離」下除「一切」字，陀羅尼後無功能。次、大周義淨三藏本。題省「摩訶」字，真言後加功能。又，法月及般若兩三藏翻，竝有序分、流通。

又，《陀羅尼集經》第三卷說此真言法，經題與羅什同。言「般若心」者，此菩薩有身心等陀羅尼。是經真言，卽大心呪。依此心真言，得「般若心」名。或云：略出《大般若經》心要，故名「心」，不是別會說（云云）。所謂如有龍之蛇鱗。

此經揔有五分：

第一、人法揔通分。「觀自在」至「度一切苦厄」是。

第二、分別諸乘分。「色不異空」至「無所得故」是。
第三、行人得益分。「菩提薩埵」至「三藐三菩提」是也。

第四、摠歸持明分。「故知般若」至「真實不虛」是也。

第五、祕藏真言分。「gate gate」至「svāhā」是也。

第一人法摠通分，有五：因、行、證、入、時是也。言觀自在，能行人，卽此人本覺菩提爲因。深般若，能所觀法，卽是行。照空，則能證智。度苦，則所得果，果卽入也。依彼教人智無量，依智差別時亦多，三生三劫，六十百妄執差別，是名時。

頌曰：

觀人修智慧 深照五衆空
歷劫修念者 離煩一心通

第二分別諸乘分，亦五：建、絕、相、二、一是也。

初、建者，所謂建立如來三摩地門是。「色不異空」至「亦復如是」是也。建立如來，卽普賢菩薩祕號。普賢圓因，以圓融三法爲宗，故以名之。又是一切如來菩提心行願之身。

頌曰：

色空本不二 事理元來同

無礙融三種 金水喻其宗

二、絕者，所謂無戲論如來三摩地門是也。「是諸法空相」至「不增不減」是。言無戲論如來，卽文殊菩薩密號。文殊利劍，能揮八不，絕彼妄執之心乎，是故以名。

頌曰：

八不絕諸戲 文殊是彼人

獨空畢竟理 義用最幽真

三、相者，所謂摩訶梅多羅冒地薩怛嚩三摩地門是也。「是故空中無色」至「無意識界」是也。大慈三昧，以與樂爲宗，示因果爲誠。相性別論，唯識遮境，心只在此乎！

頌曰：

二我何時斷 三祇證法身

阿陀是識性 幻影卽名賓

四、二者，唯蘊無我，拔業因種是也。是卽二乘三摩地門也。「無無明」至「無老死盡」，卽是因緣佛之三昧。

頌曰

風葉知因緣 輪迴覺幾年

露花除種子 羊鹿號相連

「無苦集滅道」，此是一句，五字卽依聲得道之三昧。

頌曰：

白骨我何在 青瘀人本無

吾師是四念 羅漢亦何虞

五、一者，阿哩也。躡路枳帝冒地薩怛嚩之三摩地門也。

「無智」至「無所得故」是也。此得自性清淨如來，以一道清淨，妙蓮不染，開示衆生，拔其苦厄。智舉能達，得名所證。既泯理智，強以一名。法華、涅槃等攝末歸本教，唯含此十字。諸乘差別，智者察之。

頌曰：

觀蓮知自淨 見菓覺心德

一道泯能所 三車卽歸默

第三行人得益分，有二：人、法是也。初、人有七，前六後一。隨乘差別，薩埵有異故。又薩埵有四，愚、識、金、智是也。次、又法四，謂因、行、證、入也。般若，卽能因能行。無碍離障，卽入涅槃。能證覺智，卽證果。如文思知。

頌曰：

行人數是七 重二彼之法

圓寂將菩提 正依何事乏

第四摠歸持明分，又三：名、體、用。四種咒明舉名，真實不虛指體，能除諸苦顯用。舉名中，初、是大神咒，聲聞真言。二、緣覺真言。三、大乘真言。四、祕藏真言。若以通義，一一真言皆具四名，略示一隅。圓智之人，三即歸一。

頌曰：

總持有文義 忍咒悉持明
聲字與人法 實相具此名

第五祕藏真言分，有五：初、gate，顯聲聞行果。二、gate，舉緣覺行果。三、para gate，指諸大乘最勝行果。

四、para su gate，明真言曼荼羅具足輪圓行果。五、bodhi svāhā，說上諸乘究竟菩提證入義。句義如是。若約字相義等釋之，有無量人法等義，歷劫難盡。若要聞者，依法更問。

頌曰：

真言不思議 觀誦無明除
一字含千理 即身證法如
行行至圓寂 去去入原初
三界如客舍 一心是本居

問：陀羅尼，是如來祕密語。所以古三藏諸疏家，皆閉口絕筆。今作此釋，深背聖旨。

如來說法有二種，一顯二祕。爲顯機，說多名句；爲祕根，說摠持字。是故如來自說ॐ字oṃ字等種種義，是則爲祕機作此說。龍猛、無畏、廣智等，亦說其義。能不之間，在教機耳。說之默之，竝契佛意。

問：顯密二教，其旨天懸。今此顯經中說祕義，不可。

醫王之目，觸途皆藥。解寶之人，礦石見寶。知與不知，何誰罪過？又此尊真言儀軌觀法，佛《金剛頂》中說：此祕中極祕。應化釋迦，在給孤園，爲菩薩、天人，說畫像、壇法、真言、手印等，亦是祕密，《陀羅尼集經》第三卷是。顯密在人，聲字卽非。然猶顯中之祕，祕中極祕，淺深重重耳。

我依祕密真言義 略讚心經五分文

一字一文遍法界 無終無始我心分

翳眼衆生盲不見 曼孺般若能解紛

灑斯甘露露迷者 同斷無明破魔軍

般若心經祕鍵

于時弘仁九年春，天下大疫。爰帝王自染黃金於筆端，握紺紙於爪掌，奉書寫《般若心經》一卷。予範講讀之，撰綴經旨之宗。未吐結願，詞蘇生族，于途夜變，而日光赫赫。是非愚身戒德，金輪御信力所爲也。但詣神舍輩，奉誦此祕鍵。昔予陪鷲峯說法之筵，親聞是深文，豈不達其義而已！

入唐沙門空海上表。